

歷代著聞人攷

朝邑志卷四

漢籍少公臨晉人嘗脫郭解於厄吏人逐之跡且至籍少公少公乃自殺滅口

嚴翰林其先有太子太傅名彭祖者爲左馮翊子孫因家臨晉至東漢末翰林復守本郡

北朝嚴稗玉翰四世孫仕魏爲平南將軍封邵陽侯

隋鉗耳文徹朝邑縣人曾祖靜仕魏爲馮翊太守祖朗成集二州刺史父康周荆安寧鄧四州總管別駕安陸龍門二郡守

唐嚴協稗玉四世孫仕唐爲洮州都督襲邵陽侯

嚴方約協子爲魏州司功叅軍贈太常卿

嚴損之方約子以銀青光祿大夫贈宋州刺史

嚴司業損之子其名莫考天寶中以門子經行擢宏文生調叅

朝邑志卷四

一

江陵府軍事知永王璘有異志以知免去三遷爲大理司直歷京兆戶曹掾殿中侍御史虞部員外郎拜河南令刑部郎中以儒雅遷國子司業建中閒用親累貶潮州司戶推連州刺史改郴州累加朝議大夫封馮翊縣男乞歸復拜司業有從祖姑世父母身沒絕嗣旅殯在越毀家護葬於其先塋時服其義嚴士良損之次子累官牧守弟兄友愛穆員誌其墓

李河濱曰前人之不見於史傳者多矣五泉先生曰賢人長者懿德美行湮沒多矣豈不惜哉王亦多方物色紛紛不得其具而悉心焉予之寡昧僅得嚴司業一墓文博學者其尚有以益之

嚴諱字善思以字行父延通儒術該曉圖讖善思傳其業明天文善風角褚遂良上官儀等奇其能高宗封太山舉銷聲幽藪

科及第調襄陽尉親喪廬墓因隱居十年武后時擢監察御史兼右拾遺內供奉數言天下事時方任用酷吏誅唐宗室貴戚及大臣數百家善思公直敢言告密者不可勝數武后亦厭其煩以思善爲詳審使平活八百五十餘人原千餘姓羅織之黨爲之不振乃相與構善思坐流驩州武后知其枉尋復召之長壽中按刑司刑寺罷疑不實者百人來俊臣等疾之誣以罪謫交趾五歲得還值李淳風死召爲太史令聖曆二年熒惑入與鬼后問其占對曰大臣當之是年王及善卒長安中熒惑入月鎮犯天關善思曰法當亂臣伏誅而有下謀上之象歲餘張柬之等起兵誅二張而遷善思給事中武后崩將合葬乾陵善思建言曰元闕石門非攻鑿不能開神道幽靜多所驚駭更且有害曩學乾陵國有大難異姓建國二十餘年今又營之難且復

生合葬非古也况事有不安豈足循據漢世皇后別起陵墓魏晉始合葬漢積祀四百魏晉祚率不長亦其驗也今若更擇吉地取從葬之義使神有知無所不通若其無知合亦何益山川精氣上爲列星葬得其所則神安而後嗣昌失其宜則神危而後嗣損願割私愛使社稷長久中宗不納遷禮部侍郎表奏皇后擅政爲社稷憂貶汝州刺史語姚崇曰韋氏福且塗地相王所居有華蓋紫氣必位九重公善護之及睿宗卽位崇以語聞召拜右散騎常侍尋以譙王重福事論死初重福徙均州過汝州而善思在焉問以天文及謀反遂除禮部尚書故重福敗坐關通論死吏部尚書宋璟戶部郎中李邕薄其罪給事中韓思復固請乃流靜州始善思爲御史中書舍人劉允濟爲酷吏所陷當死善思力訟其寃得免戶部尚書王立本見之曰祁奚之

救叔向嚴公有之後見允濟語未嘗及之思復之善思也亦不自德時人皆稱其長者後遇赦還開元十六年卒子向乾元中爲鳳翔尹有政聲積官大常員外郎卿自延至向三世皆年八十五云

劉星柱曰嚴公之厚德不宜以占風角事女主罷祀王河汀言之矣然猶未及論武韋兩后事也論武后不當合葬乾陵雖據其術言而陰外之此當時所不及議論韋后擅政則非剛正而不懼禍者不能也議罷祀者其亦未之知矣今錄而著之則生平之厚德皆本正直而可輕議乎哉後之賢哲必有聞風而復其祀者

別慘安祿山叛時尚衡舉義兵討賊署爲牙將蓋亦知義之士也

元王由義字仲方起家以文學掾歷禮部主事拜中臺御史至禮部侍郎初爲徽政院都事能抑內侍節浮費爲御史屢有獻替從上上京抗章論衛士縱牧躪民田不便由是行營無敢犯者在西曹嘗議江西行省戰功至相震怒殊不爲動廷論壯之在臬曹主四方獄持法平允以是稱其能嘗語人曰先祖贊蠶一邑尚不希世苟合今位通顯何敢鹵莽在儀曹數年練習典故禋祀科舉設施注措如指諸掌歐陽元贊曰由義眞賢者也作王氏世德記

王楫字濟川家朝邑之秦邨經儒門習法律吏於開城興元二路選陝西理問所令史累遷朝列大夫秦州知州踰年乞休以中議大夫同知奉元路總管府致仕翰林編修太子文學曲江張冲志稱天曆兵興關陝大荒協同汪司徒均布國澤期盡拯

救之方差潼關勸富人運米而西以佐濟卹灌州洞蠻耗邊費
議招安邊徼寧謐及知秦州民罹饑饉荒政又最它郡卒葬秦
邨

郭均字叔平至政辛卯由儒職轉儒林郎尹郿旣去民爲立石
頌德稱郭儒林遺愛其政重民務督課農桑開學延師教養子
弟有害政蠹民與不率教者悉伏法一時訟簡盜息鄉村樂與
爲善引甘谷水溉田千餘畝常平倉粟至四千餘斛興元金鳳
盜起爲之申嚴關隘每遇運糴軍儲則分籌均派吏人不敢高
下其手前後輸粟四萬餘石而民不稱偏焉郿縣志常視遠贊
曰國步倥偬而施爲若此可謂良吏矣

明高翔朝邑人有文學矜名節洪武中以明經爲御史諸所論
奏無不關國家機事當上心者建文時尤戮力戎事激發忠義

朝邑志卷四

四

靖難後上召翔翔喪服入見大哭語又不遜遂族翔沒其產諸
給高氏產者皆加稅曰令世世罵翔也親戚悉戍邊又發掘先
塋雜牛馬骨焚灰揚之而以其地爲漏澤園

程濟本姓成蔡家堡人以明經爲四川岳池教諭距邑數千里
往來於里而岳池學事不廢建文初上書言某年月日西北兵
起廷謂非所宜言繫至京將誅濟召入仰而大呼曰陛下且囚
臣至期無兵臣死未晚也遂下獄已而兵果起赦濟以爲翰林
編修充爲軍師護諸將北行徐州之捷諸將樹碑叙戰功及統
軍姓氏濟一夜潛往祭碑人莫測其故後文皇過徐見碑大怒
趣左右椎碑一再擊遽曰止按碑族誅無一得脫者惟濟姓名
以椎脫得免曩之祭蓋蘇之也初濟與邑人高翔竝以明經徵
翔厲名節濟好奇術翔止濟勿爲濟不聽已而有兵事濟又勸

翔學其術翔曰我願爲忠臣也金川門破翔召濟死事濟曰願爲智士翔竟死之建文急召濟入門計濟曰天數已定惟可出亡免難耳建文如言濟從之每遇險幾不能脫賴濟力得免從行數十年後又隨如南京人尚識濟後莫知所終其子廉善鎗文皇嘗稱成國公鎗法後知有廉召與成國校併於殿庭廉進退敏妙成國弗能當也土心賞其能命爲錦衣衛千戶子孫至今猶有存者

馬仲昌爲大理寺左寺丞中曲里

楊景學爲金谿縣丞布政恭父

楊恭西莊里初爲給事中歷刑科都給事革除間文廟靖難師起朝議命曹國公統師問罪恭疏言宜先遣使講和不宜輒行征討忤旨黜爲蒙自縣幕文廟卽位檢閱封事諸言進兵者皆

罪之唯恭主和議甚喜問恭何在得至命除爲布政使部難之以爲他省無缺獨缺在陝西恭不得往上曰朱買臣不爲會稽邪恭奚不可遂給勅令馳傳往恭徒步之官廉得賊吏多所貶退居九年以廉貞終於左使蓉塘集云永樂二年以刑科都給事楊恭爲陝西布政使次日陞辭蓋文獻足徵矣

王良健兒村人以十七年貢入太學二十四年刑部問事明年以勤能授山東部試主事又明年欽署本部郎中事主事三十年陞都察院右僉都御史授中順大夫月支俸二十四石爲事三十一年謫刑部郎中戶部尚書郁新薦其行能陞刑部右侍郎授嘉議大夫月支俸三十五石建文元年正月准咨奉旨文武官員在京的一品至七品都與誥命八品九品都與符契欽此祖父與父獲有贈封此國初文移故存其舊

周道受春里授洪洞訓導陞助教擢御史山西按察司僉事道中式時驛歸將渡渭一老嫗從後呼曰君騎卒妾子也妾孀居無倚恃此子而生且念當渡渭故追視之耳道惻然舍騎徒步歸人稱長者道後爲御史征雲南口總兵餽珍寶幾千金峻卻之義不受憲僉時有惠政卒於官舍喪出衆庶遮道哭奠是可
以知道矣

蕭斌喜慶里舉第二人乙丑進士正統歷吏科都給事中通政司通政斌爲人正直管易州柴廠保定志稱其廉謹自守初斌以嬰孺患痘疹死家人歛以小樽投之河榜人張某者數夢老父追呼救人覺而兒啼樽中白蕭氏至今官棄稷棄冰上生豈虛乎哉拔故志斌宅心公恕事不避難門無私謁

靳能沙底里馬邑縣教諭山陰縣知縣教馬邑時有門者某少

俊而貧能憐之偕諸子男同席研書時其衣食後又攜至縣舍遇之恩禮益有加已而舉進士爲陝西叅議爲豎楔綽下鄉躬自存問是時能已卽世延其配坐上坐叅議匍匐下拜擁扶至不得答拜後爲中丞意孜孜厚恤不厭君子曰能之施信厚矣而叅議下拜使不答蓋長厚者哉近世未有也

劉讓親賢里成化丙戌進士任戶部主事夔州府知府讓有氣槩先是爲主事監太倉恥與奄人和同故不相能謫東萊通判後遷永平府同知彊項如故永平志稱其剛斷

楊珪中曲里舉第三人獲鹿知縣太僕寺寺丞在縣以廉謹稱居三載被徵或謂之盍飾儀容中科道選珪局局嘆曰吾非不知羞而不爲也居之自如竟以二毛補太僕丞不列清秩未幾以憂歸當是時逆瑾用事服竟乃不肯起家諸里戚以好語彊

之終不聽已而瑾敗濡足者及於難而珪號知幾清操益著幅巾終身杜門謝客於公門絕無干請至今號爲清楊子孫終窶且貧古語有之曰廉官可爲而不可爲珪有焉

劉偉中曲里人文水知縣徵爲御史兗州府知府文水多豪強前令往往債事偉至部使者封其杖二具諭曰以此禁切梗化者偉藏不用獨以誠心直道爲理居久之衆庶傾心向化境內馴治於是偉嘆曰孰謂文水悍乎政恐人不肯作好官耳爲御史持法平允出知兗州未幾卒於官偉爲人忠厚老成且至孝御史時銜命清戎河南行部至宜陽報母病疾未及上疏兼程遄歸得母子一訣居喪廬墓三年至今言孝必稱劉氏世傳偉落第與第者同舍有拜其第者乏人供茶偉代爲之人笑曰若不第爲第者役乎偉曰若不第又不肯爲人役乎衆服其雅量

王學謨曰偉好奕適遇而翁來色不懌偉終身不奕此孝之一事也余道晉陽馮憲使爲余言劉公仙去或作爲傳吾友王傳著論闢焉蓋曰劉公正人也神之者誣之耳共以爲然王邕字汝器孚祐里宏治庚戌進士授戶部主事出掌錢穀於古北口觀潮河川難守乃上禦戎策敬皇不果行旣而請理京衛牧馬草場畜牧事宜當是時房山豪民侵牧地邕檄涿州守按驗守不敢問謝去邕自按之且急豪民有與援邕不顧曰法如是也爲員外會詔求直言疏列五十餘事尋爲郎中督儲遼東又條奏邊儲戰陳方略過山海關憲臣以誘殺勘邊士罪邕又疏言實非誘殺急行功賞以厲士心巡歷諸倉輒疏便宜七事會口入塞又請選將添兵并薦其可任者數人兵部銜之論謫阿迷州同知南人馴服署蒙自縣歲侵不請先發以貸飢者

擢守和州辯察抑導水利和民戀之爲立生祠後爲蘇州府同知以直道迕時遂免歸

張磬字中和樂豐里東鹿訓導舊志稱磬尚書甚精長老爲余言磬茂才時督學伍公福有風鑑謂磬雖得舉三十年寒官耳後磬歷訓導萬泉教諭遼東都司教授左遷如其云前輩長厚信義委命不以智才求也

張珣防于里聊城知縣大名府同知以清謹著名先爲通判吏部舉天下廉有司二十人珣與焉

梁文盛沙底里延津知縣莒州知州延津志稱其識見精明才幹克濟修學宮事舉而民不謫戊寅歲余會延津李叅政戴於左輔言文盛修學宮堅固六十年不壞嗣者易灰以土亡何滬漏然後知前人之懷永圖也

朝邑志卷四

馬驥懷恩里甲辰進士汶上知縣山東通志稱名宦中廉可正人不敢干以私有所可爲不避當道竟以此去官人至今寃之於乎當道者安在廉明方正驥之名不朽矣

雷爵防于里清苑知縣邳州知州大名府同知先是爵兩任一十八年廉謹自持俸稍外無分毫取後遷同知爲親行服已而禮竟謁選於吏部大學士楊文襄公雅重爵訝之曰若非知清苑守邳州者邪我爲外臺出清苑者三邳州者再歷歷聞子修名今老矣大名善地今以付子爲優游桑榆地爵出而嘆曰大名養濟院邪我七十年孀居嫠婦更再醮邪至大名貞廉如初行部蕭然匹馬果蔬自給卽館穀亦不肯受時林縣馬郡守謂韓恭簡公曰自雷先生貳郡我雖一言不敢輕發數年得嚴師矣其見重如此

蕭鵬字萬里江田里新寧知縣瀘州知州四川通志云鵬知新寧刑清訟簡多著愛民之政

周瑄沙底里道之姪永平府推官順德府通判恭簡公稱其世濟清白或介直道宜惠瑄謹篤

韓邦靖字汝慶紹宗第三子生而靈異號爲奇童五歲讀文王至德篇掩卷若有思者父問之對曰卽如是武王非矣父大奇之八歲通舉子業十四舉於鄉二十一舉正德戊辰進士拜工部虞衡司主事奉部檄監十庫與奄人抗禮奄人絀服已遷員外郎都水司郎中是時詔求直言邦靖乃上疏曰夫民者樂安而思治惡危而厭亂向背之際甚可畏也臣竊見陛下自卽位以來朝政不修經筵罔御盤遊無節狎近羣儉摧折骨鯁之臣閉塞諫諍之路百度乖違庶事叢脞府庫空竭閭閻流散盜賊

災異薦至迭興危亂之形已成社稷之憂將大頃者乾清官災陛下下詔求直言在位羣臣疏論剴切時政缺失指陳略盡天下之人皆以爲天心仁愛啟佑聖衷必將延攬聽納革旣往之愆圖維新之化潤澤生民永昌社稷在此一舉不意陛下徒事虛文不修實政凡諸過舉仍遵往轍臣工章疏罔有施行而部官黃體行乃又以言罷去天下人心莫不囂然沮喪以爲陛下遭此大異因循恬安尚復如此是陛下無悔悟之期天下無治安之日渙散支離不可收結書曰民可近不可下下尚不可而况使之離哉夫親離者家散民離者國搖故漢儒有土崩之言先哲有搏沙之喻臣每念及此實懷隱憂伏望陛下以社稷爲念於以收旣散之人心迓將來之福澤疏上天子震怒下錦衣衛獄給事中李君鐸率衆論救乃得奪官爲民辛巳秋世廟卽

位起爲山西左叅議分守大同革奸平獄權豪歛跡是時天子修定策功封爵太濫而高山陽和諸衛軍士奉例開墾草場數千餘頃皆爲豪家占種乃前後上疏論列又皆不報未幾大同歲饑人相食又奏議請發內帑賑濟不許爲之慙然泣下復抗疏論列又不報復疏乞歸疏報未下卽行西歸之日軍民遮留號泣不忍舍去抵家乃損食不豫呼苑洛子曰吾其逝矣十九日必大雷雨其日果大雷雨尋卒時年三十四先是正德時上早朝御階有匿名帖言瑾罪惡瑾矯旨命各官跪奉天門下是日天暑酷烈又無片雲僵者數人邦奇體素羸至午氣微昏眩呼曰死矣安得少水活我衛士剖瓜飲水邦靖匍匐攫取食兄兄得甦同跪者以失儀爲懼邦靖曰救兄獲罪所不辭也樊叅議爲立孝弟碑

韓邦奇字汝節紹宗次子學有本源學者稱苑洛先生治尚書時卽著蔡傳發明禹貢詳略宏治甲子乃以書舉第二人會試不第歸著律呂直解見志正德戊辰成進士授吏部考功司主事陞考功司員外郎明年辛未考察都御史私袖小帙竊視邦奇曰考覈公事有公籍在何以私帙爲乃掣其帙封貯不檢都御史爲遜謝同曹郎皆縮項失色尋調文選司太宰托意爲官擇人欲發視缺封邦奇執不可曰發則有私諸曹咸依阿邦奇執愈厲卒不更太宰銜之未幾京師地震上疏極論時政闕失謫平陽府通判決滯獄倡理學號一時卓異甲戌陞浙江按察司僉事所蒞疏寃雪枉抑強扶弱除貪獎廉節財愛民而不畏權要不憚險難尤人所不及它時浙無巡撫統攝故賦役獨稱煩費邦奇理其事弛張裁割身當怨勞釐爲四科事從節縮法

嚴徵敬公不費供私不厲民歲省以百萬計抵今遵承命曰韓公科條焉逆廝錢寧託寵義子以鈔三萬錠符浙省易銀當事者歛餽如其數邦奇檄知縣吉棠散其歛卒不餽宸濠將舉逆先命內豎假以飯僧聚千人於杭州天竺寺邦奇過寺見之立爲散遣濠又以儀賓託名進貢假道衢州邦奇召儀賓而詰之曰進貢自當沿江而下奚自假道歸語爾主韓僉事在此不可誑也後三年濠果通謀鎮守欲襲浙江賴前事發姦不竟逞邦奇謂鎮守爲浙之蠹不少假借鎮守怨之奏邦奇擅革進貢誹謗朝廷逮赴詔獄詔奪爲民旣歸謝客講學四方學士負笈從遊者日衆乃著周易集說以覺來學辛巳世廟詔起爲山東布政司叅議尋乞休甲申復用言官薦起山西左叅議是年大同巡撫都御史張文錦偕亂遇害官守竄匿紀綱蕩廢邦奇欲入

大同城去二舍許逆者使二人露刃迎且宣言城不可入是夜故燒叅將宅以懾之邦奇單車入城時諸司無官邦奇獨任其事約法二條以戢暴亂曰大夫出疆安利所在專之可也幾兩月鎮城雖稍安人不自堅因事屢變邦奇率以誠信感格不至成亂十一月上遣戶部侍郎胡公瓚提兵問罪疏其姓曰罪人得獲卽日班師鎮人聞之大譟復謀殘虐邦奇迂侍郎於天城以處分事宜馳白都御史諸軍聞言出於公信之始解兵翌日傳首軍門邦奇謂侍郎曰首惡旣獲宜速給賞使城人畏威懷德亂可彌寧侍郎不聽復生他變假使當時卽任以巡撫宣布恩威可無再舉顧使不終而代惜矣乙酉竟致其事而歸戊子起爲四川提學副使尋改右春坊右庶子兼翰林院修撰經筵啟沃關繫重大其秋主順天鄉試命題斥當時權力柄事不悅

言者承風旨謫南京太僕寺丞己丑再疏而歸尋陞山東按察司副使大理寺左少卿以左僉都御史巡撫宣府至鎮謂戰馬倉糧皆邊務之首卽平市估以易馬出紅腐以足軍咸爲感悅時大同再變王師出討百凡軍需倚辨宣府悉力經理有備無乏乙未入佐院事與掌院尚書王公廷相同寅協恭臺綱振肅尋改巡撫山西於是旌循良黜貪暴定徭役平賦斂節驛傳禁和買憲度肅然旣而巡歷邊塞增飭戰守之具拓老營堡城垣募軍常守以代分番而邊屹然可恃戊戌四疏乞休乃復致仕甲辰復用薦起總理河道陞刑部右侍郎改吏部右侍郎太宰周公用喜得佐理翕然委重丁未陞南京都察院右都御史復進南京兵部尚書參贊機務旣司留筦振修百廢封植基本議保靈長五上乞身勉畱皆溫語卒遂初服益修舊業倡導來學

居八年乙卯會地震卽世豈非地紀絕而哲人萎邪有識者於是乎有蒼生之憾焉訃聞贈少保賜諭祭諡恭簡云

牛斗字應宿蔡家堡人甲戌進士以親垂白乞終養已除工部主事嘉靖初徙兵部武選司郎中世宗詔革先朝冒濫軍功傳陞帶俸武職無慮千數亡何冒濫者賄於當軸乃於詔書中開黃緣之路被汰者醵金數萬遍賂柄事兵書力爲之地獨難於斗懷金千兩無門可入兵書欲斗爲委曲難言之而令司務廳喻意斗執不從兵書不得已召斗於火房爲好言誘之曰此當國者意也吾與若爲之奈何斗曰朝廷初詔號稱聖明未幾輒欲反汗其何以示天下兵書曰彼柄政者欲之子但奉行何患無奚遷斗曰壞國紀而博好官某不爲也兵書頷而斥之曰若老鄭也豈遠方郡守出張掖門邇回而泣者有矣斗曰老先

生戀戀富貴一旦失位不免飲泣若某素寒儒也罷官守窮願甘心何哭之爲兵書愈怒幾欲撲之而不得因移病不視事兵書令他代署先汰革者復職如故斗以此無何出知萊州與貴勢不合致其事而歸

程範字君儀縣丞珏子豪邁不羣初任開封府通判有袁倉官者餽餘金一盒嘗範怒而叱去頃之以艱歸復除大名府賈祝被殺道傍其事莫測範悉號召其附近居民集於北張舖而微伺其偶語果一人惶怖將以遁去範執之鉤鉅發其先後盜狀擒治黨與人稱神明府舊治故天雄鎮元時圯於河鞠爲茂草範以暇時督率民兵樵蘇陶磚不煩公帑而四門堅完屹爲河朔保障河決杜勝奉檄董治相視水勢自白屋皮口築堤七十餘里水患遂息鄉人爲立遺愛碑以勁直不容於時歸里公論

惜焉子惜

王朝雍字仲和郎中邕次子性至孝父以言事繫獄雍遍謁諸貴人叩頭求解膝至青腫初受嚴州府推官多所平反作理刑銘嘉靖改元應詔言事勸上勤學禮下節用恤民及革文臣子孫冒濫軍功者行縣不受餽遺自爲市菜和粥人謂之王青菜居五年陞澤州知州澤富饒庫人以羨金嘗之立置於法又榜示條約罷不便民者數事郡中憚服青羊山盜起檄朝雍紀功隨征剿已而軍敗陷賊中賊以仁德不忍加害諭以威信賊因送出卒得賊所據要害及相扇之情白當道曰伺險進兵兩省齊發使賊腹背受敵乃可逞也賊平如朝雍策始在賊中郡人共詣神祈禱比回日香煙四十里沿祠祭報其得人如此已進懷慶府同知澤人爲立去思碑更三郡操守益嚴監濟瀆神池

之貨不隨俗窳取自潤巡撫徐公讚疏其賢陞南京戶部員外郎郎中山西按察司僉事卒於官

雷子質字伯華安仁里少時穎慧能詩矢口而成與韓公邦靖竝稱奇童年十四應試監臨者奇其才謂拾芥一第會有飛語不果及庚午舉於鄉辛巳登進士授潛山知縣未及之官卒京邸世傳子質故諸生李九疇後身始九疇與諸生周盤同時歲比相爲伯仲而盤差優九疇忌而侮之爲盤所傷而死子質父雷冬者曰晝假寐前廳夢九疇直入臥內呼之不應已覺而子質生知爲疇也比卒時冬又夢疇長揖而去訝之亡何訃至子質果不祿矣先是冬輸粟五百石賑飢有司格之不爲關白不得入監子質射策甲科稱元善之報云

樊得仁字恕夫孚祐里河津知縣徵爲御史四川布政司叅議巡關時以功有文綺白金之賜褒曰忠勞可嘉初得仁閱武太平寨會有口警激周叅將力戰具俄而果獲首口以故兩人竝褒焉

王朝塗字仲冕邑第三子丁丑進士初授三河知縣有權璫張銳坐東廠先是知縣青衣小帽謁銳私第跪而獻贄塗獨不往會銳以禮來冠服及門又不肯屈銳滋不悅邑富民假銳勢影射差役貧者代辦塗清出之且按其罪以故銳大怒屬意當事欲罷塗官適銳有私人從旁解之曰縣君廉銳怒稍釋得調鹿邑鹿邑健訟塗爲文告諭民多感化沈邱盜起所在蹂躪塗繕城塹張疑兵爲備甚具寇至城下三日百計攻取而塗極力捍禦寇退而疾不可爲矣病中遷宿州知州卒

王三省字誠甫朝雍長子癸未進士初授大名知縣以才收長

垣人有謀其弟產者自殺妻子厚誣弟婦假手於所私倉皇告變三省迎謂曰此爾自殺何與它人遂窮治其舉一縣盡驚在事五年以治行異等徵爲吏部主事會其父朝雍守澤州陷賊巢中給假往省之旣已以伉直爲當事所銜左授戶曹監兌浙江劾把總劉某不畏城社已遷郎中彰德府知府善馭宗室事事不因循滋弊亦不更張立異務在便民法加於豪強惠施乎惇嫠聲稱益著以憂歸復除保定當孔道不能趨時逢迎改潞安尋以疾乞歸築太樸園讀書其中比蓋棺有書數千卷而已始病時自作傳論比於行已有恥蓋篤論哉子傳以詩鳴

楊時禮字大節望仙里高密知縣調文水縣余舉於鄉會諸長老而時禮號長者謙言不宜於文水狀余曰公而自謂是乃所以爲長者也余道文水知其以長厚稱矣

劉元登字仲升讓曾孫新都知縣起榮河縣唐文襄督學時閱卷得元登驚訝曰此大魁也賞嘆不置與吾道竝梓其文其年得舉然竟不第

王朝弼字季良番第六子初授直隸井陘知縣口寇山西樂平逼近井陘填撫欲朝弼飛報意在邀功朝弼不聽卒得賊敗承清廠衛同事者日至羅織疑似民不聊生不樂於官力陳休致兩任不滿一載風節著焉

張源澄字靜夫文水知縣解州知州文水劇邑而解又逼鄉里難其理澄一意執法不肯少貶以狗因自號曰一可解人呼爲

癩張

嚴天祥字叔善望仙里舉第六人甲辰進士除降縣知縣旣三年徵去一錢不著於身去之日父老遮道攀留者以千數天祥

持法不假借常約束吏胥竟徵去兢兢不敢縱以此百姓戀之已酉選爲四川道監察御史居三月病卒

程珏字兩玉長春里爲諸生有名以貢爲富順縣丞下車捕胡遐逋稅千石及諸不法事縣人服又捕治巨盜虎刺寶賂以千金不色動戴氏子苟有合殺三人金多而獄久不成訊而決抵厥辜蓋其公廉正直故不可干以私後以母氏憂遂不復出稱高尚焉其子範有父風

蔚能字惟善受春里人以吏員宣德元年授光祿寺典簿陞寺丞正統十四年隨駕北征舉總督左掖軍務景泰初以功陞本寺卿賜錦衣金帶以旌其忠天順初進禮部右侍郎歷事五朝廉能謹慎後以忤旨調南京光祿寺卿三原溫公純廳署芳規曰公視寺事三十年不持一禁嚮遺私邸也其尤爲人所稱者

既偕同官疏請覈內供器皿詔下禁獄私謂同官曰上怒叵測能老矣當獨任之母累諸君也已而獨受責降調南京未嘗有後言卒賜諭祭

樊資字文首北石村人成化中以掾吏任榮縣典史歲饑出俸作粥勸設賑濟羣盜嘯起督繕城池仍單騎往諭之羣盜以平去後民爲立碑宏正間榮士大夫宦遊秦者多登堂拜謁有泣下者

韓紹宗字裕後號蓮峯南陽洪人成化丙辰進士授刑部主事陞郎中轉福建按察副使在刑部執法正直不可干以私有樊舉人者壽寧侯客也因以出入諸勳戚聞代爲奏狀多所排誣怨家發其事下刑部紹宗知樊匿壽寧侯所抗法出之下於獄一日晨出門見地上一卷文字取視則備責樊罪狀謂當死罪

紹宗笑曰此其所自爲也一訊而服同官驚問樊何乃自爲此對曰韓公非可動搖以勢所生則必死今言死者左計也紹宗曰我豈若是汝罪不至死耳杖而釋之又囚有亂義男婦者當以死冢宰三原王公恕疑其太重對曰義男犯其主與子同科則亂義男婦者奈何弗死也冢宰以是益重之時直省有大獄選曹司奉命出鞠多推紹宗初往真定再赴大同皆以平允聞宏治初疏論時政多見俞允在福建執法明恕部民久而思之四子長邦彥次苑洛先生邦奇次五泉先生邦靖季邦翊邦彥字汝哲正德丁卯舉人官至鄭州知州苑洛五泉詳前志邦翊太學生固始縣丞

翟吾道字宗儒平羅人嘉靖乙酉舉人爲崞縣令崞故貧脊健訟而逋賦抵任數月治理整肅俗不擾而輸賦最奉檄監放犒

軍銀二指揮欲有所高下以爲利吾道憫然曰邊人蒙矢石暴霜露甚苦而吾輩顧因以自潤如天理何乃爲班次而給之軍人皆悅半丑上計改博平稍遷大名府通判攝滑縣有衛輝盜劫官帑誣連滑大姓巡撫令叅議行滑執之一縣皆驚吾道抗言證其無辜不肯遣叅議愧屈大姓得免其剛毅有執類如此王傳字爾習三省子嘉靖庚子舉人爲高邑令以不能阿時免歸傳生而好學工於詩初至京代人作謝櫻桃詩爲時宰所賞免官後益肆力風雅卓然自成一家之音河濱洛苑詩酒徜徉年八十二乃卒所著有西溟集

王夔文美子爲鄖陽照磨以請封無例卽棄去曰子不榮親奚以官爲里人稱善士焉

王學古字子獲號渭汀高城人與從弟學謨同中壬子舉人至

壬戌成進士爲壽春知縣調廣宗以治行第一擢判順天府尋遷刑部員外郎告歸養母歿服闋補原官見罪人每泣下多爭獄於上官及調戶郎乃謂人幸脫此怵心簿書矣遷郎中清苦自砥疏辨空頭勅餽賜忤中官出知漢陽府地衝疲繁供億又多盜乃纂簡明圖說謀於監司檄丈田均賦役盜且息革館驛中火親行部驗之去官輕裝就道著有甄覆集

王學謨字子揚號河汀學古從弟嘉靖癸丑進士知大谷縣擢南京戶部主事歷陞河南按察司僉事兵備潁州遷雲南布政司叅議未行改山西按察司副使兵備岢嵐隆慶元年坐邊事逮繫謫戍萬曆元年赦還十年以言者薦詔還原官二十二年起山東巡視海防徙曹濮遷左叅政分守山西河東告歸十餘年卒年八十一爲人端雅敢任事大谷地富而俗悍前令多爲所

辱及學謨至持己廉潔明於摘發威令大行俗爲一變他縣訟不決者皆願移質大谷各得其情遠近稱神觀察江北益振風紀務自省約擒治巨盜百餘人破散其黨察屬吏貪殘者悉按治之內有六安知州係巡按御史所親御史囑爲縱釋執不從御史怒伺其過終無所得治兵岢嵐嚴禁冒功殺降於河壘築邊牆二處受金帛之賜明年順天巡撫缺世宗語大臣王學謨實心幹事可用也爲忌者所阻不果用乃益築老營堡及賈陀乃河二堡自太原之西南牧道約二十老營乃河爲大由老營出關河口從大同賈陀乃河二堡漸於朔州嘉靖初大同殘擾棄兩堡俺答遂依乃河之阻往來寇邊於是老營勢迫而全晉皆驚矣其出人三岔五寨興岢離石皆由此四十二年巡撫萬恭奏修兩堡已報可會恭憂去各官難其事學謨乃力任之廣

設方略嚴守望築三堡以二十七日而畢興復數十年棄地父老有泣下者明年俺答將以十萬衆入寇學謨知三關兵不足恃建議請隔鎮兵爲犄角上郡於永石青龍渡孤山於興臨二縣渡縱三關兵不肯直前而二鎮張疑兵敵以我兵從天而下此一奇也督撫遲疑不聽及俺答至三關兵果無一人前者學謨坐困偏頭關嬰城孤守俺答遂陷石州殺知州王亮雷壁二十餘日而去諸將覘知乃稍稍出掩獲奸細海明及他老弱以爲功學謨獨揚言致於朝曰偏老孤懸非有寧武雁門重關之險曲突徙薪旣不見信於前握兵督將又不相援於後兵司一秀才能抗十萬之師乎於是同事者各以黨援營救有亡爲功罪而學謨乃坐不固守謫焉起廢後年幾七十清操彌厲蒲州去家數十里州守致供帳珍器於里居峻卻之去日不以土產自累用此稱譽籍甚然終以不能俯仰乞歸同時達人金甌稱其振救窮人力除貪墨乃愛功名畏中傷者所不肯爲官箴有玷懼人議其後者所不敢爲也時以爲篤論家居每昌言閭閻利害讀書操觚至老不倦所著有被褐子等集朝邑志八卷尤具有史法

段朝宗字公見一字華河魯坡村人登嘉靖乙未進士授中書舍人已拜兵科給事遷禮科巡視京營條奏防秋八事多見施行值籍沒大學士嚴嵩衆少其報贓金銀欲改駁朝宗執不可曰此穢物也非朝廷正賦官吏豈無浸沒今爲駁還浸沒者卒不可出而波累平人貽害不細衆善其言而止時薊鎮總督多奸利事科部無人發者朝宗獨抗疏論之部臣多不悅又疏京營士馬不得假借市恩同官多干請皆格不行以故怨者益衆

有蜚語聞遂出知永平府尋改徽州府婺源盜方張議以盜固齊民可理論也曉以禍福皆相顧悔悟會宣言大兵將集盜應時解散作諭數十條力行教化訟者至庭導其悔悟風俗遂變又治魚梁壩以興水利設關老竹嶺平治疊嶺皆便民民歌樂其事郡故有二賢祠祀金城彭澤岐山王繼禮遂以朝宗參之名三賢祠忌者劾其好名左遷山東鹽運司然徽人思之卒以並祀後數十年邑人李河濱楷嘗至齊雲山猶相傳段太守詩愛慕不衰云

雷士楨字國柱新市鎮人少穎悟有風節六歲時從學於禮苑洛先生韓邦奇與言古人成敗事相往復容城楊繼盛故師邦奇及以諫謫狄道尉過謁久語士楨從旁竊視聽意甚壯羨既去誦言曰客真丈夫哉作人不當如是耶邦奇益奇之謂門人

張明傳兒他日當以諫顯正慮過激吾老不及見子後以我意語之年十七爲諸生父世濟爲署官張銘暴杖死士楨與母亟訟卒不得直啼泣嘔血幾死母解諭使專意問學語詳賢媛於是自字雪菴年三十登萬歷甲戌進士會銘久以他故暴死遂更字慕菴初授太常博士太常亡舊籍每祭乃倉卒問樂舞生士楨以爲天子禮樂不可若是簡也搜討故實作太常考八卷後遵用焉又當修九陵祭器九陵宦者故冒水衡錢而出二百餘年積廢器以困部使士楨見牲匣有九扣宦者曰太常供一物陵殿用一器此陵三少牢耳牲匣餘六將安用之宦者辭服遂簿定祭器所省不貲時張居正方盛喜史侍王篆縉紳爭趨附篆欲親士楨使人道意終不往六年以母憂去十年拜浙江道監察御史方三日卽疏論潘晟晟居正同鄉以宗伯罷居家故

嘗爲司禮馮保師居正病亟其黨謀以辰易制詐爲江陵疏薦
自代馮保援於內遂徵晟已赴命至臨安朝臣大懼而士楨疏
論之疏入馮保持數日不下流言且杖士楨廷臣咸爲之危中
書楊東明焚香祝天願卒佑善人而天子時已卹居正竟罷不
召晟頃之巡中城宦戚皆相戒勿觸禁已復巡漕往漕舟每先
斯至運弁多覓京貴人書求薦獨一無所徇薦乃先無書者又
御史薦吏例有謝金或專受武以爲無損清名亦一切拒絕是
時立州縣考成法吏坐侵欺贓賂累者常數十家民大受害乃
條議上之欲革其弊當國者不能用年四十以疾乞歸聚書萬
卷日事校讎四方多就學者性孝友中年益篤衣食皆先奉兄
兄有所督過唯唯聽謝素儉約巡漕時經費比前使者不及半
每謂子弟惟儉則窮可以無求達可以助廉然好施與嘗貸麥

富室比至門持袋告急者已分十二三卒年四十五家至貧無
以營葬焉子壯爲諸生

雷大道字行卿別號義齋居西關萬歷癸酉舉人知廣靈縣縣
故邊衝又屬大褻極意拊綏捐俸以賑墾荒千餘頃稍遷通判
兗州府署府事核糧儲卻常例數千金旋署嶧縣縣素凋敝前
令被逮不能去大道至月餘清諸紛拏前令得釋以母老不能
迎養遂告歸年則五十五天性孝友田廬推美者與兄及兄子自
取薄惡僅足蔽風雨供饋粥女兒弗贍迎養五十餘年敬愛如
一日居鄉與物無競好施與倡修金龍寺浮圖尤爲一邑形勝
其卒也王公之衆志其墓所以推尊之者甚至名臣之言信而
可徵矣

郭如魯字唯一陽昌村人年十六爲諸生父廷璋客死河南裏

糧步險負骸而歸萬歷癸酉舉於鄉教諭平遙歲荒盡捐廩米以賑丙戌成進士知曲周縣縣故健訟以德意感諭卽訊者多遣散之稍遷同知東昌府攝清源廉其巨猾剔治如法州故車車算賦地易爲緇築主者堅以故事請嚴禁絕之不使內外有所關通加封識以待來者聲望大起會病乞歸不及而卒張徵音字祚康號綠野白塚人萬歷丙子舉人知山西口口縣調河南孟縣作堤以障黃河時稱張公堤又調寶豐政務優閒感時裨政作旁觀抵掌等書徵音知略輻輳有當世才限於資格不得竟其志在山右時城守禦盜用鉦鼓柝鈴四物辨方向後遵用之又著論謂地寡者各於其地如地網法半高半下以備水潦不惟田得利且可設險其它設施多類此高才跌宕詭浪笑傲皆成文章邑人至今能道之

王嗣美字實之傳季子萬歷庚辰進士除太原推官以明允稱擢南戶科發南閩主考沈某關節疏論侃直又條時政缺失忤當國者意調山西河東道宗人暴橫殺人有司莫敢問嗣美按發如律藩府歛戢擢江右糧儲叅政徵發押運索耗之弊剔杜一清調補荆南提督太和山羽流數千人皆有奧援凌辱長吏莫可誰何列狀上聞摘其渠魁正法輿論快焉以病乞歸薦起再補河東緣舊治益加拊循遷山東驛傳值事急兼攝兵道繕城治器操練軍士又條攻守要務矢自効用不報遂以病乞歸陞山東按察司予告著雜集十二種

王醇如字允淳學謨弟學讓子萬歷壬午舉人授鄖陽同知值歲凶爲分地立限以賑商南有鬻子輸餒者以俸金抵之再補永平攝灤州邵常例金監司問羨金對日出納等耳安取羨金

特建橫渠祠以倡正學稅璫勢方張請脫其私人之麗於法者不聽卒論如律摧知貴陽府經理蠻部方略輻輳制府郭子章當世名臣每咨訪焉議建貴定縣增置守備創恤隱局以慰羈旅申報帑餘數千兩聲望大起又以剿苗功子章薦擬貴寧道副使未報以憂去起補兩浙鹽使奏最爲天下第一會大計屬吏有修卻者譖於上官擬將左遷遂告歸不起事繼母雷至孝雷見節孝

雷元善字汝仁士楨族弟少貧牧羊年十八始事讀書鈍不能成誦家人將廢之自請題爲文破承如旨遂卒業萬歷丙戌成進士知仁壽縣縣叢盜多豪幾不可治又給事上官掾吏以干數執符下縣則揖讓令前索良馬責苛禮小不如意輒蜚語中傷令不得不屈元善至卽挫強剔蠹疾惡如讐不少假借一歲

之間威稜四著盜息民安各吏皆伏不敢動然陰搆之上官卒得罪去年三十五終於家

王家允字錫吾學古子萬歷乙酉舉人性慷慨有爲太原別駕復自代州遷守安樂州州爲遼左咽喉廷議在和邊而諸將輒邀功啟釁乃作籌邊遺議不果行遷永平郡丞凡軍民不相得者爲區理之歿王事者厚恤其家待遠人以忠信不欺後致仕歸

李用中字詢莢一字俞所寺后社人萬歷乙丑進士三仕爲令皆有名蹟而內江上蔡尤號難治用中砥礪廉隅調劑寬猛甚得物情徵入爲武選郎奉勅清黃釐奸弁諸譎弊殆盡有財勢者俱歛手無敢撼時論壯之歷八載出爲河南叅議過里卒於家

李朴字季白街子里人性忠鯁敢言萬歷辛丑進士觀政吏部聞母病請假不俟報而行謫判高唐州起府推官歷彰德太原擢戶部主事管通州倉時朝士各立朋黨臺諫尤好相攻訐神宗春秋高不復視朝大臣郎署欲空朴不勝憤上人望幾空疏不報是時天下正賦多缺朴以爲缺賦由民貧民貧由稅瑞爲害又東廠司李俊播虐鎖拿曹縣主簿甄志義拷求數千金朴先後上書極論皆不省朴每一疏出人爭傳誦前論人望一空羣小悚懼而朝廷曾無可否由是科道益無所忌後爲郎中復指名劾之疏奏滿朝傾動科道四十餘人交章辨攻朴復數疏力辨語侵閣臣葉向高奉旨李朴出位妄言着部院看來說怨者改爲議處咸欲死之值慈聖太后喪建言例在赦列遂得不死歸方朴奏上時神宗名以瘋狗光宗在東宮每袖其疏及卽

位進太僕少卿起用光宗崩而朴亦以是年卒也著書有調刁集雪亭集數卷祀於學宮晉中丞擲其主於地然終不能革也

孫育才

國朝康熙甲子舉人

王之寀字蓋甫又字心一楊昌村人剛毅有大節萬歷辛丑進士除知無極縣無極舊協鄰驛後因道經業增設五馬而協者如故之寀力請罷之歲省三千餘金沿河兩岸鑿千餘井灌田又教植樹桑爲鄉約六十餘所置社九十餘學以宏教化調上谷慶雲陞大理左評事刑部主事首發挺擊事挺擊者萬曆三十

十四年五月

初四日

山西時有

身于張

差持棗木

挺闖入慈慶官

擊傷

殿前

下韓本用

等縛付東華門

指揮朱雄

等奉

詔得

率太子面諭百官立誅差及龐劉二瑞寢其事事雖寢而由是陰得罪官闈踰年竟削籍還家熹宗立以薦起原官請復三儻曰用藥通外挺擊言尤切至悉置不問屢陞刑部侍郎魏忠賢擅政與同志連疏論之而三案之禍及矣楊維垣承忠賢旨言其貪功冒進幾危國本奪誥命又言其先詐鄭國泰銀二萬追贓擬戍劉志選言戍未盡辜逮捕詔獄方欲置辨銅手披落二頤立斃獄中崇禎改元逆璫既誅詔褒其忠乃復刑部侍郎子建斗以廕授戶部主事

張綸音字作欽少貧僑居關門或不舉火二親歿啜泣讀書成名始歸萬歷辛丑進士除知隆昌縣改大名教授知邵陽縣歷南戶部郎中知漢陽府湖廣按察司副使在官懲奸蠹詭訟以威稜著而持己廉在漢陽時漢口賦無定數乃立限額不多取

朝覲例資千金禁除之緝巨盜百餘人境內肅然

井東星字聚五號奕垣南畱社人萬歷甲午舉人累知嵐林及延津在嵐勸輸有法在林得士心至延甦驛困人尤德之爲謠曰廩延驛餓馬石夫木官吏鑊有銷石有碎木頑恒受氣蓋狀其苦也擢濟南通判陞永平同知

翟事心字鑑寰平羅村人貧時授經於高陽言動以禮萬歷丁酉舉於鄉知保昌縣嶺徼故淳事心於民撫教篤至士民甚愛慕建祠祀之調判東昌府署濮州歸讀書教人無公門之謁八十六乃卒爲官以作人爲先於保昌得廖侍御攀龍於濮得葉掌院廷秀廖國朝初巡茶入關先詣師門令人掖而拜之距在任四十餘年矣所著有抱甕集十卷

李聯芳字同春南畱社人萬歷丁未進士知洧川縣時巨盜二

紅四紅橫行郡邑聯芳督民兵設計擒渠魁破散其黨調真
御吏嚴明積猾見面皆五色無主自奉至廉食雜麥豆屑湯餅
而已遷戶部主事權臨清稅會大旱舟阻困商抗疏謂商亦民
也寧虧在官毋虧在商尋陞員外郎以內察歸後入賀光宗卽
位卒於京祀真定名宦

王惟精字環中一字中池新市鎮人未遇時族有與人鬪而自
縊者鬪者賄惟精不受後以萬歷癸卯舉人由教諭陞知肥城
縣會山左盜起捍城有方略諸當事以爲能量移知應州州地
險而民困不以事擾百姓爲肥家計生平多藝畫尤佳

李繼芳字蘭畹聯芳季弟萬歷癸卯舉人知三河縣縣近京貴
戚中涓率侵奪民田吏多魁黠徵輸增益民大困乎爲盤算濫
派毫忽悉清除減糧幾三千金請著爲令天旱禱於神有龍蜿

蜒見蜥蜴形以石自擊之應手霆震大雨霑足人呼爲時雨令
後家居自署堂聯人無公是枉裁減浮糧二千八百兩我有至
娛且受用美酒三萬六千場其感慨如此長兄時芳萬曆己卯
舉人仕至知州亦有政聲

王于陞字啟宸別字文石嗣美從子少有神童名萬歷丁未進
士以二甲授戶部主事權稅崇文門嚴御羣瑞寬商旅卒溢額
數千金分毫不以入己超陞郎中督餉薊州州人思其德祀入
名宦歷官岢嵐兵備道流寇掠代城親率兵戰敗之獲其渠魁
特陞布政使予告歸以詩自娛作漫園自稱漫公著有漫公集
改革後閉戶不出日長偃卧夜起讀書死之日遺命以衣冠棺
斂不受帛不樹碑速葬於墓邑人李河濱楷稱其修幹方頤望
之肅穆言必韶令詩好陸放翁其人其文風雅可慕達不玷名

窮不慚節者也

徐宏基字恢先太陽社人萬歷己酉舉人太原教諭陞嶧縣令
嶧故巖邑又在蓮妖之後累囚甚夥宏基辨析開釋後爲杭州
同知入武闈有以利營者峻却之卒於官

成珍字鎮寰後改名瑛成家莊人家貧雅自持拾金還主活兩
命萬歷癸丑進士知鉅野縣愛民如子民不忍訟歲饑賑粥躬
親調度邑無死亡頃之調武強時呂公維祺以司理至縣民男
女老幼數萬人求保畱瑛哭聲震野呂爲涕泗及在武強遷官
將還士庶涕泣爭送貧無以歸至剝所服帶後屢遷戶部郎中
上疏多見嘉納時以多事命各官輸馬瑛傾俸幾不足購京師
戒嚴分守東門月餘給餉獨豐軍士德之聞於內神宗稱歎遷
知夔州府清直益著爲吏皆兢兢法度值生辰士民製錦幃稱

壽琢金爲字瑛畧遠視以爲銷金書者久之始覺立命別還秩
滿歸家讀書教子弟不以親故干邑宰邑大利病則力爭之亦
無有不從里書詭寄飛酒多嫁役貧弱不避勞怨爲清釐著籍
用之數十年邑東接蒲以河西徙蒲人強侵田格鬪不已多死
者上書當事云土地人民政事茲謂三寶朝之灘地晉實吞之
朝之赤子晉實殺之土地之謂何人民之謂何膜視紛爭不爲
振救政事之謂何後乃得旨各撫按會立界河東潼關互箝制
亦親往調劑蒲朝械服爭遂息少有志操老彌貞方嚴峭直人
皆敬而畏之卒日貧如洗至無以給喪歿後四十餘年鉅野人
追思不置崇祀名宦流寇之亂邑紳多受其禍以珍爲賢下令
敢入成氏村一隊皆斬此與司空圖馬文升相類弟珩崇禎癸
酉舉人孫藻 國朝康熙壬子拔貢

趙勉字競喻號還白泊村人有孝行萬歷壬子舉人授新蔡令
新蔡風號疲敝兼多嵒力農者希勉躬詣阡陌指授錢鏹無
減家督民始樂業剔奸蠹雪冤獄卻羨金人服其廉明焉
王孫綬字紫侯學謨孫萬歷壬子舉人會試語使宦官抑副榜
教諭聞喜正身帥士寬巖有體萬鹽使徵主秦晉豫三省館教
化大行歸里營葬哀毀卒

王祚字克纘王彥莊人天啟丁卯舉於鄉知慶雲縣崇禎癸未
春大兵入境祚誓衆曰封疆事重我輩等死耳寧死城中勿死
城外也率把總李傑等相持十餘日圍解督撫以聞命未下以
憂去逆闖入關追餉以祚廉免之逼授華州知州逃避不受入
嗣朝至康熙庚戌卒於家邑人士多有詩哀之李河濱楷云
誰將累卵作干城追憶當年淚眼橫武定傳聞號烈鬼慶雲僅

得守書生山河搖蕩分今古日月遷流變大明叨竊逸民爲野
史欲操彤管意難平徐貢士鸞云南來戎馬滿長干海氣昏埃
但一寒聖主河山憑大造孤臣性命寄微官一牆以外死非所
數步之中血未殘往事閒論悲壯烈於今往事論尤難

王鑰字翼肩于陞從子崇禎辛未進士歷汶上東阿令皆有惠
政謫河東臬司暮失之歸隱作園扃戶讀書江寒滌暑不釋卷
李楷字叔則晚號岸翁學者稱河濱先生聯芳子少聰敏好古
文學讀書朝萊山殊自刻苦異人馬顛仙謂當以文章名世弱
冠舉天啟甲子鄉試構卷五齋以五經分授從學者屢上春官
不第築通帝樓高十丈許命書牘日送圖籍手自評隲已而避
寇白門與馬元御王雪樵韓聖秋稱關中四子抗疏論秦事不
畢行入國朝知寶應縣縣頃刻附淮益困力請仍歸揚省解

草米水脚及減院米草折合萬一千金有奇暇則行遊名勝
詠遍邑中求詩若字者無貴賤皆厭其意然竟以傲視中讒謝
去流寓廣陵幾二十載構堂名霧與李大虛著二李瑀書文名
川傾海內與金幣以乞者日踵於門久之歸里值雨臺修陝西
通省志延至會城臺司皆郊迎執賓主禮抗揖上坐縱飲揮毫
遊覽城南每有一作當事爭付梓復應梁茶使緝延至關隴間
病歸運左腕詩更敏妙六十八而卒其制義古文詩歌當代名
宿錢牧齋陳百史張爾公吳自尾施愚山文太青輩交口引重
書法宛平王敬哉稱爲一代神手畫事雲間蕭尺木自讓爲不
及亦旁及二氏之學故自號棗栢居士又曰西嶽褐道人所著
文集如千種合爲河濱全書一百卷子益瓚建皆能文世其家
學

王在宥字引恬暉如長子歲貢生事祖母及二親以孝聞友愛
兩弟三十年督家政無私蓄隨父任經孤竹部下有餽以金者
力拒之其子丕振居官清白亦能世其家

上官宏基字孕昌上官村人崇禎癸酉舉於鄉入國朝應教
授陞營山知縣縣故號繁盛一切供給取辦里民帷帳口一易
宏基悉斥罷政尚寬簡吏胥束手相繼辭去亦聽之不相制罟
曹蕭然及卒於官民如失父母爲建祠會祀蜀道險遠貧無以
歸爭輸金助裝逝肩靈輻直踰棧道其遺愛在民如此

雷于霖字午天自號栢林子崇禎癸酉舉人幼貧性至孝親歿
幾不勝喪壯好古文學爲文奇挺研理聲譽翕集時流寇猖獗
倡衆築泰安堡全活多人入國朝順治丙戌土人縱暴入城
知縣宋大儒逃去于霖謂衆曰此名舉義皆不義者也天厚其

毒懼禍吾曹曷蚤自貳焉因以兵法部勒堡入擁官入城城中
嚮應遂滅賊邑人德之然卒歸功大儒所著有孝經神授篇西
銘續生篇太極圖說栢林集別世言復自爲傳以傲醉吟先生
河南湯潛庵斌 本朝大儒兵備潼關時造廬商略理學驩如
宿好表其門曰學宗濂洛邑人李河濱稱其文以贍勝曰讀
栢林集使我意氣怒生又使我肅然泣下且使我嗒然喪我也
其感世也摘奸如巨斧之析薪誅惡如燎火之焚枯揚孝闡節
如燭龍之炳暗別世言洞死生齊得喪冥毀譽多人所不敢言
則膽包宇宙矣真文壇之子龍也子衍恩邑諸生有孝行杜門
讀書詩文亦得家法

王鉞字巖甫別號松園新市鎮人明崇禎己卯舉人入 國朝
除知吳橋縣有仁慈聲以不適時宜歸日以著述講學爲事學

海邑志卷四

三

者翁然宗之稱爲松園先生就正者往復不倦所著有論孟正
義錄性理三解松園集墨堂集及歿遺令作宦數年非余所好
歛惟時服而已

中官李本長春里正統時爲御用監太監賜蟒玉歷事四朝年
八十乞身遣中使送歸私第卒賜諭祭故志稱本事其兄政最
恭謹張福寺後里選充內侍掌司設監被蟒衣寵榮王新孚佑
里給事御馬監孝皇時駕前馬驚逸人莫敢前新控勒就上
壯之陞少監賜蟒玉後與壽寧侯廷爭事拳毆壽寧謫南京火
者卒葬南京

趙天陝 仲禮汧村人生而靈異性端方行不左右願未嘗妄
與人立談五經子史 過目輒不忘周易尚書兩經能爲舉子
業尤精易占六歲時父世榮遺其兄天叙就師仲禮亦欲往世

榮不許廼不食世榮遣之每誦讀雖暑夜世榮將農獲而燈猶未熄每奪其燈令寢焉年十五從韓苑洛先生遊驚以爲神童先生每語諸生古人建功立業多在少年如孫策沒時纔二十七他日再言之仲禮曰所遭之不同也使天秩當其際豈肯令孫權保有江東哉先生嘆曰此武侯志也年二十爲諸生尋卒時明嘉靖癸卯歲也天叙亦以奇童並名先卒初母馬孺人數夢兩紫龍飛入室卽飛出二子生而皆大此其徵也苑洛先生誌其墓爲之銘曰余嘗觀關中形勝西自崑崙發脉落於三輔長河自西北而南華嶽諸山自西而東會於潼關水口纔丈餘耳關鎖之密結構之巧天下莫並也京兆扶風漢唐來名賢相望而朝邑爲氣止之地顧少聞焉意謂必有建功立德之賢待時特起及見吾仲禮謂文武之器將相之業在是矣乃又少折

豈渭洛二水界破天心耶且三水皆崩走不常故氣之聚也則賢才生其散也則隨之而歿如吾五泉大夫靈陂雷子往往皆然可恨哉吁嗟乎紫龍飛兮何日歸兮吾無淚可輝兮

劉愛字仁夫受業韓恭簡之門爲諸生博學能詩造門從學者屣履常滿雷侍御士楨幼以父執事之嘗欲和人百首詞甫就其一有柴門日月閒句愛見而作色曰汝薄孫敬耶天壤閒載籍甚繁義理無窮惜陰競辰猶恐不逮何可作如是語士楨卽削其藁下帷發憤其成就人類如此頃之隱去居聖山寺十餘年歸老洛濱布衣草食時或弗給而陶然自樂年九十餘乃終張恢綱字時憲樂豐里舉人馨元孫少爲諸生亡何棄去一意稽古肆力羣籍尤究心理數之學謂邵蔡諸子皆有偏駁於是窮搜互証著參兩數一書爲類八一曰分易分疇二曰易三曰

疇四曰律呂五日六甲六口口口七日皇極經世八日規天條地凡若干卷闡前聖未發之蘊正先儒襲舛之失人服其精深生平甘貧礪志不苟交遊有古大儒風

張可賢字鳳臺韓恭簡外孫古朴不飾容儀閉戶讀書年八十猶於庭中自設一榻濡毫吟詠不輟詩文皆不苟而表韓公墓文鋪叙詳贍識者以爲苑洛功臣

郭肯獲字穉仲陽昌村人純朴一如不辨權衡讀書無所不窺時推博雅崇禎己卯舉於鄉明運旣終遂隱居不出雷栢林于霖稱其對世也若木若訥迨世道頻革人皆龍矯已獨鴻冥豈學古無獲者能之乎弟肯堂棄諸生偕隱逆闖入關中強徵肯獲欲用之肯獲亡去繫肯堂獄脇致其兄肯堂終不屈卒得兄弟全節時稱爲二難云